



Xalq so'zi

O'zbekiston —
kelajagi
buyuk
davlat

2025-YIL — ATROF-MUHITNI ASRASH VA "YASHIL" IQTISODIYOT YILI

1991-yil 1-yanvardan chiqa boshlagan

WWW.XS.UZ

E-mail: Info@xs.uz

2024 yil 8-yanvar, № 4 (8899)

Chorshanba

Saytimizga o'tish uchun QR-kodni telefoningiz orqali skaner qiling.



VATANNI ULUG'LASH SAN'ATI



Sarhisob



Keyingi yillarda yangi O'zbekistonda sport siyosat darajasiga ko'tarildi. O'tgan yillarda Prezidentimizning sportga doir 10 dan ortiq Farmon va qarorlari, Vazirlar Mahkamasining 100 ga yaqin me'yoriy-huquqiy hujjatlari qabul qilindi. O'zbek futboliga har qachongidan e'tibor yuqori bo'ldi. Ayniqsa, bolalar futbolini ancha rivojlantirdi. 2024-yili ilk bora futbol bo'yicha olimpiya terma jamoamiz Fransiyaning Parij shahrida

bo'lib o'tgan XXXIII yozgi Olimpiya o'yinlarida Vatanimiz sha'nini munosib himoya qildi. Olimpiya o'yinlarida 206 ta mamlakat orasida ishtirok etgan atletlarimiz 19 ta sport turi bo'yicha 90 nafar sportchi bilan qatnashdi. Musobaqani O'zbekiston sport delegatsiyasi 5 ta sport turidan 8 ta oltin, 2 ta kumush, 3 ta bronza bilan umumjamo'a hisobida 13-o'rinda yakunladi. Bitta Olimpiadada sakkizta oltin medalni qo'lga

kiritgan yurtimiz sport jamoasi Osiyo qit'asida 4-o'rinni, turkiy va islom mamlakatlari hamda MDHga a'zo davlatlar o'rtasida 1-o'rinni egalladi.

Olimpiadada o'zbek futbolchilarini qardosh xalqlar ham kuzatib bordi. Har bir futbolchiga astoydil ishqibozlik qilgan muxlislarning hayajonli hissiyotlarini aytmaymizmi?



Oliy Majlis Senatida

ISHONCHLI HIMOYA KAFOLATLARI

Oliy Majlis Senatining Sud-huquq masalalari va korrupsiyaga qarshi kurashish qo'mitasi majlisida bir qator qonunlar dastlabki tarzda muhokama qilindi.

Unda senatorlar, mahalliy Kengashlar doimiy komissiyalari raislari, Yoshlar parlamenti hamda qo'mita huzuridagi ekspertlar guruhi a'zolari, qonun tashabbuskorlari, mutasaddi vazirlik va idoralarda hamda ommaviy axborot vositalari vakillari ishtirok etdi.

Jumladan, "O'zbekiston Respublikasining ayrim qonun hujjatlariga shaxsning huquq va erkinliklarini himoya qilish kafolatlarini yanada kuchaytirishga qaratilgan o'zgartirish va qo'shimchalar kiritish to'g'risida"gi qonun muhokama etildi.

Barchamizga ma'lumki, mamlakatimizda amalga oshirilayotgan islohotlar natijasida sud-tergov amaliyotida insonning huquq va erkinliklarini himoya qilish kafolatlarini ta'minlashga qaratilgan ilg'or va samarali mexanizmlar yo'lga qo'yilmoqda. Mazkur qonun bilan jinoyat sodir etganlikda ayblanayotgan

shaxsning erkinlik va shaxsiy daxlsizlikka oid konstitutsiyaviy huquqlarini sud tomonidan ishonchli ta'minlash maqsadida jinoyat ishlari bo'yicha tuman, shahar sudlarida tergov sudyasi lavozimi joriy qilinmoqda.

Tergov sudyalari tomonidan jinoyat ishlari bo'yicha sudga qadar ish yuritish bosqichida protsessual qarorlarga sanksiya berish va ma'muriy huquqbuzarliklar to'g'risidagi ishlarni ko'rib chiqish masalalarini qonunchilikda belgilash uchun o'z vakolatlari jumlasiga kiritilgan vazifalarni bajarish asoslari hamda tartibini nazarda tutuvchi o'zgartirish va qo'shimchalar kiritilmoqda. Muhokama davomida senatorlar qonunning qabul qilinishi tergov faoliyatida shaxsning huquq va erkinliklarini ishonchli himoyalash kafolatlarini yanada kuchaytirishga yo'l ochishini ta'kidladi.



Oliy Majlis Qonunchilik palatasida

DEPUTATLAR KORPUSINING TASHABBUSKORLIGI VA FAOLIGI — USTUVOR MAQSAD

Oliy Majlis Qonunchilik palatasining navbatdagi majlisi bo'lib o'tdi. Unga raislik qiluvchi quyi palata Spikeri o'rinbosari Rahim Hakimov mamlakatimiz ijtimoiy-siyosiy hayotidagi muhim jarayonlarga to'xtalib o'tdi. Prezidentimizning Yangi yil bayrami munosabati bilan O'zbekiston xalqiga yo'llagan tabrigidagi xalqimizning fidokorona mehnati, siyosiy, ijtimoiy faolligi alohida e'tirof etilganini ta'kidladi. Shuningdek, davlatimiz rahbari ishtirokida shu yil 3-yanvar kuni bo'lib o'tgan majlisda mamlakatimizning Davlat byudjetiga oid masala ko'rib chiqilgani, deputatlar byudjet ijrosini nazorat qilishga alohida e'tibor qaratishi kerakligi qayd etildi.

Mamlakatimiz rahbarining Oliy Majlis palatalarining o'tgan yil 18 – 20-noyabr kunlari bo'lib o'tgan majlislaridagi natijalarida belgilangan ustuvor vazifalarni amalga oshirish bo'yicha Qonunchilik palatasining Harakatlar dasturi tasdiqlangani, quyi palata bu yilgi faoliyatida Prezidentimiz tashabbuslarini birinchi galdagi vazifalari sifatida belgilab, ularni og'ishmay amalga oshirishi lozimligi aytib o'tildi. Ayni chog'da bu deputatlar korpusidan katta mas'uliyat bilan ishlash, saylovchilar manfaatlarini ta'minlash

borasida yanada tashabbuskor bo'lish talab etilishi lozimligiga e'tibor qaratildi.

Majlisda kun tartibidan o'rin olgan o'ngacha yaqin, jumladan, yer uchastkalaridan foydalanish tartibini yanada takomillashtirish, sud hujjatlari va boshqa organlar hujjatlarini ijro etish tizimini mukammallashtirish, elektron sigaretalar muomalasini taqiqlash, qishloq xo'jaligi tavakkalchiliklarini sug'urta qilishga qaratilgan qonun loyihalari atroflicha ko'rib chiqildi.



QUYOSHGA YUZ TUTIB, SHAMOLNI IZMIGA SOLGAN YURT

Muqobil energiya

Mamlakatimizning iqtisodiy o'sish va demografiya dinamikasi elektr energiyasiga bo'lgan talabning yiliga 6-7 foiz ortishiga olib kelmoqda. Bu borada uglevodorodli energiya resurslari o'rini muqobil manbalar bilan qoplash muammoning yagona yechimidir. Zotan, yurtimiz osmonida quyosh to'rt faslda charaqlab, bepoyon kengliklarimizda shamol bezavol esarkan, bundan samarali foydalanishni yo'lga qo'yish hayot-mamot masalasi, desak, mubolag'a bo'lmaydi.

Dastlabki hisob-kitoblarga ko'ra mamlakatimizda elektr energiyasiga bo'lgan ehtiyojning 90 foizdan oshirog'ini quyosh, shamol va kichik gidroelektr quvvatlari yordamida qanoatlantirish imkoniyati mavjud. Shu bois "O'zbekiston – 2030" strategiyasining 51-maqsadida "yashil" iqtisodiyotga o'tish, uning asosi bo'lgan qayta tiklanuvchi energiyadan foydalanish ko'rsatkichlarini keskin oshirishga oid vazifalar belgilab berilgan. 2030-yilga borib qayta tiklanuvchi energiya manbalarini 25 ming megavattga, jami iste'moldagi ulushini esa 54 foizga yetkazish ko'zda tutilgan.

Aslida qayta tiklanadigan energiyani jadal rivojlantirishni ta'minlash, energiya ishlab chiqarish manbalarini diversifikatsiyalash, shuningdek, elektr energiya tarmog'iga

to'g'ridan-to'g'ri xorijiy investitsiyalarni jalb etishga ancha ilgariroq kirishilgan. Davlatimiz rahbari o'z faoliyatining dastlabki kunlaridayoq muqobil energiya manbalaridan foydalanish ko'lamini kengaytirish vazifalarini ustuvor belgilab, 2018-yilning 15 – 17-may kunlari AQShga tashrifi doirasida Jahon banki guruhiga kiruvchi Xalqaro moliyaviy korporatsiya bilan kelishuvlarga erishgan edi. Shu asosda Navoiy viloyatida quvvati 100 mVtga teng birinchi quyosh fotoelektr stansiyasi bunyod etilib foydalanishga topshirildi. Shundan buyon turli hududlarda umumiy qiymati 1,9 GVtga teng 9 ta quyosh elektr stansiyasi ishga tushirilib, tarmoqqa elektr energiyasi uzatish yo'lga qo'yildi.

Yaqinda Prezidentimiz tomonidan qiymati 7,2 mlrd. AQSh dollarilik, quvvati 4,4 GVt

bo'lgan 24 ta loyiha, jumladan 3,7 mlrd. dollarlik 18 ta yangi quvvat ishga tushirilib, navbatdagi 6 ta loyiha qurilishiga start berildi. Ushbu yangi loyihalar tufayli yaqin istiqbolda qo'shimcha 9,5 mlrd. kVt-soat elektr energiyasi ishlab chiqarishga erishilib, 2,5 mlrd. kubometr tabiiy gaz tejaladi, 4,6 mln. tonna zararli gazlar chiqishining oldi olindi. Boshqacha aytganda, mamlakatimizdagi xonadonlardan qariyb qirq foizining toza elektr energiyasi bilan barqaror ta'minlanishiga erishish orqali iqtisodiyotning turli tarmoqlarida qariyb 4 mlrd. dollarlik qo'shilgan qiymat yaratish imkoniga ega bo'lamiz. Ya'ni mamlakatimizda joriy yilda jami 84 mlrd. kVt-soat elektr energiyasi ishlab chiqariladi. Bu – 2016-yildagiga nisbatan 25 mlrd. kilovatt-soat yoki 1,5 barobar ko'p demak.



